

BiH na putu u NATO



Sjedište NATO-a u Bruxellesu: Ne treba gubiti vrijeme

Izbori važniji od MAP-a

Ministar Cikotić smatra da ćemo ubrzo nakon konstituisanja nove vlasti ispuniti uslov postavljen u Tallinnu i od naredne godine započeti prvi ciklus ANP-a

Ministar odbrane Bosne i Hercegovine Selmo Cikotić rekao nam je jučer da nema nikakvih signala koji bi nagovještavali da će tokom septembra 69 lokacija sa perspektivnom vojnom nepokretnom imovinom biti uknjiženo na državu. Taj uslov postavljen je pred BiH na neformalnom sastanku ministara vanjskih poslova u aprilu u Tallinnu, kada je odlučeno da naša zemlja bude pozvana u Akcioni plan za članstvo u NATO-u. Bilo je to prvi put da se jednoj državi koja je izrazila želju da postane članica Sjevernoatlantskog saveza uslovno dodijeli MAP. Najuticajnije članice NATO-a, poput SAD-a, željele su tako potaknuti vlasti u BiH da do jeseni riješe ovo važno pitanje. Kako bi ih podsjetila na tu obavezu, američki državni sekretar Hillary Clinton je prije nekoliko mjeseci poslala pismo predsjedavajućem Predsjedništva BiH Harisu Silajdžiću. Ni to nije doprinijelo rješavanju pitanja vojne imovine.

Predat nacrt

Premijer Republike Srpske Milorad Dodik smatra da se imovina može samo ustupiti na korištenje MO, odnosno OSBiH, što je u suprotnosti s onim što NATO traži. U Federaciji BiH su danas jednoglasni - vojna imovina je državna i treba je knjižiti na MOBiH. Iako ne postoji politička saglasnost koja bi dovela do skorog ispunjavanja uslova iz Tallinna, neke državne institucije su na vrijeme uradile svoj dio posla. Zamjenica ministra vanjskih poslova i predsjednica NATO koordinacionog tima pri Vijeću ministara BiH Ana Trišić - Babić je prošle sedmice uručila nacrt Godišnjeg nacionalnog plana (ANP) za prvi jednogodišnji ciklus MAP-a komandantu štaba NATO-a u Sarajevu, brigadnom generalu Davidu B. Enyeartu, otpravniku poslova Ambasade SAD-a u BiH Jonathanu Mooreu i norveškom ambasadoru Janu Braathuau (Ambasada Norveške je kontakt-ambasada za NATO u našoj zemlji).

NATO koordinacioni tim je uspio ovog ljeta uraditi nacrt ANP-a, očekujući da bi do septembra, kada startu-

IPAP punom parom

- U okviru IPAP-a u ovoj godini ćemo raditi većinu stvari kao da je MAP u pitanju na nivou politike, pravne regulative, sigurnosti i odbrane, administracije. To je set mehanizama koji uključuje sve državne strukture, kazao je Cikotić.

ju redovni ciklusi MAP-a, mogao bi biti ispunjen uslov za početak njegove primjene. Iz Ministarstva vanjskih poslova je poslije sastanka sa generalom Enyeartom saopćeno kako je Trišić - Babić istakla da je članstvo u NATO-u jedan od vanjskopolitičkih ciljeva BiH i da će NATO koordinacioni tim nastaviti aktivnosti na njegovom ispunjavanju. Međutim, Cikotić ne vidi da ćemo ove godine ući u provođenje ANP-a.

- Postoji jedna druga stvar. Individualni partnerski akcioni plan (IPAP), u kojem se nalazimo, sadrži više od 80 posto svih instrumenata MAP-a. Zato nećemo gubiti vrijeme i to je realna dimenzija. Ovdje je više problem u tome što domaće političke strukture nisu sposobne da postignu konsenzus oko nekih bitnih pitanja, jer se isto tako moglo desiti da potpuno izgubimo vrijeme. Ali, na sreću, ovdje to nije slučaj, kazao je Cikotić.

Postoji razumijevanje

On očekuje da uslov iz Tallinna bude ispunjen brzo nakon konstituisanja vlasti u BiH poslije izbora, 3. oktobra, i da ćemo bez problema sljedeće godine ući u ispunjavanje obaveza iz prvog godišnjeg ciklusa MAP-a. Cikotić kaže da u NATO-u razumiju razloge zbog kojih to nije urađeno u proteklih pet mjeseci (kratko vrijeme, izborna godina... op. a.) i da su dobro informisani.

- Mislim da je NATO dijelom, što znači i međunarodna zajednica, dužan da učestvuje u rješavanju tog preostalog pitanja. Nije to samo obaveza domaćih struktura, rekao je ministar odbrane BiH.

Daniel OMERAGIĆ

Dodik i Tadić otvorili most na Savi kod Rače

Predizborna podrška Beograda SNSD-u



Predsjednik Srbije pohvalio svoje i Dodikove višegodišnje napore kako bi privredna i ekonomska saradnja postale - konkretne

Novi most na Savi kod Rače predstavlja čvrstu sponu između Republike Srpske i Srbije u komunikacijskom, ekonomskom, privrednom i svakom drugom pogledu, poručili su premijer RS-a Milorad Dodik i predsjednik Srbije Boris Tadić, koji su jučer novi most svečano pustili u funkciju.

Spajati narode

"Ovaj most predstavlja krunu višegodišnjeg napora koji smo Milorad Dodik i ja dali kako bi se privredna i ekonomska saradnja pored sve one koja već postoji između RS-a i Srbije, a u skladu sa specijalnim i paralelnim vezama i materijalizovala, odnosno kako ta veza ne bi ostala samo na dobrim namjerama već bila pretočena i u

konkretna djela", rekao je Tadić, prenosi Srna.

Predsjednik Srbije je napomenuo da su ukupna sredstva od 12 miliona eura obezbijeđena iz Nacionalnog investicionog plana Vojvodine.

Premijer RS-a Milorad Dodik istakao je da se, pored ove kapitalne investicije, realizuje "još jedan uspješan projekat koji će još čvršće i snažnije spajati narode s obje strane rijeke Save".

"U naporima koje smo ovdje zajedno činili da poboljšamo standard i komunikaciju između ljudi s obje strane ove rijeke, koja po definiciji treba da razdvaja, a mostovi da spajaju, djelima se pokazuje šta kao političari radimo", rekao je u duhu predizborne kampanje Dodik i podsjetio da je Vlada

RS-a za ovu investiciju obezbijedila milion eura.

Brži protok

Drumski most koji je jučer otvoren kraj starog drumsko željezničkog mosta dužine je 400 metara i 11 metara širine. Ukupna vrijednost projekta je 13 miliona eura, od čega samo za most 11 miliona, a dvije pristupne saobraćajnice mosta koštaju po milion eura.

Izgradnjom ovog mosta biće omogućen brži protok putnika i autobusnog saobraćaja. Granični prelaz Rača je najfrekventniji prelaz u RS-u i od početka godine preko Save je prešlo oko 40.000 autobusa i kamiona, oko 150.000 automobila i više od 650.000 putnika. Izgradnja je počela 2007. godine.

V I J E S T I


Alkalaj - Afanasijev



Petogodišnji planovi UNDP-a

Ministar vanjskih poslova BiH Sven Alkalaj primio je jučer rezidentnog koordinатора UN-a i rezidentnog predstavnika Programa UN-a za razvoj (UNDP) u BiH Jurija Afanasijeva. Razgovarano je o predstojećem zasjedanju Generalne skupštine UN-a, i u tom kontekstu, o provedbi programa i projekta koje UNDP trenutno vodi u BiH i o planovima za naredno petogodišnje razdoblje. Planovi uključuju programe demokratskog upravljanja (reforma javnog sektora, lokalna uprava) socijalne inkluzije, zaštite životne sredine, povećanja sigurnosti kroz uništavanje viškova municije, te povratka izbjeglica.

Halilović - Ehsan



Pomoć ženama žrtvama rata

Ministar za ljudska prava i izbjeglice BiH Safet Halilović i direktorica Populacijskog fonda UN-a (UNFPA) za Ukrajinu, Bugarsku i BiH Nuzhat Ehsan potpisali su jučer u Sarajevu memorandum o razumijevanju vrijedan 38.081 dolar.

Ovim memorandumom obuhvaćene su tri oblasti i to razvoj strategija za poboljšanje statusa žena žrtava rata u BiH, razvoj socijalne politike za osobe starije dobi i unapređenje provedbe Akcionog plana Međunarodne konferencije o populaciji i razvoju, saopćeno je iz kabineta ministra Halilovića.